




# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 2, No. 7

website: [www.geocities.com/navalbec](http://www.geocities.com/navalbec)

Pebrero 2006



Most Rev. Filomeno G. Bactol, D.D.

## Mensaje

### PASALAMAT

Ako, ang inyong ubos nga sulogun, kauban sa mga kaparian sa parokya sa Naval, kinasingkasing nga nagpasalamat kaninyong tanan sa inyong aktibo nga pagduyog sa kasaulogan sa atong kapistahan sa Mahal nga Birhen sa Rosaryo niadtong Enero 26-27, 2006.

Daghang salamat:

- \* sa atong mga sponsors sa misa-novena ang mga BECs, mga opisina, mga eskuylahan, mga cofradias, religious movements ug organizations;
- \* sa atong mga Priests Sponsors;
- \* sa Mother Butler Mission Guilds sa ilang nindot nga mga bulak ug dekorasyon sa altar ug sa ilang mga bag-ong vestments.
- \* sa mga choirs: Parish Choir, Singles for Christ Choir, Youth Franciscan Choir, God Heals Children's Choir, ug ang Holy Rosary Senior Choir;
- \* sa atong Parish Pastoral Council (PPC) ug sa Parish Formation Teams (PFTs)
- \* Sa mga kaparian sa Diocesis sa Naval ug mga bisitang pari;
- \* Sa Mangco-Garcia Clan ug sa atong Municipal Officials ug mga Empleyado sa nagkalain-laing ahensya;
- \* Sa atong mga bisita ug kanatong tanan nga mga matuohon dinhi sa parokya sa Naval;
- \* Ug uban pang mga kaisogon nato nga sa hilum naghalad sa ilang pag-alagad;

Daghang salamat kaninyong tanan! Ang Ginoo, pinaagi sa pangama sa Mahal nga Birhen Maria sa Rosaryo, magpanalangin kaninyo sa kanunay.

Bishop FILOMENO G. BACTOL, D.D.  
ug mga Kaparian sa Naval



## PAMALANDONG SA EBANGHELYO

**Febbrero 5, 2006** - Ika-5 nga Domingo sulod sa Tuig  
Basahon: Jb. 7:1-4,6-7/1 Cor. 9:16-19, 22-23/Mk. 1:29-39

### Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

### Tema: (Basahon human sa mga paambit)

Sa ebanghelyo karong adlaw gipakita ni San Marcos ang kadugtongan sa mga milagro nga gihimo ni Hesus ug sa nahigmatang pagtuo sa mga tawo nga nakasaksi sa maong mga milagro. Ang pagtuo maoy nagtukmod sa katawhan sa pagpangayo nga ayohon sila ni Hesus. Ang kaayohan gikan sa ilang mga balatian maoy nagdala kanila ngadto sa mas hugot nilang pagtuo kang Hesus.

Ang pagkaayo sa ugangan babaye ni Pedro nagpakitang mas labaw pa kay sa talagsaong gahum ni Cristo sa pag-ayo sa lawas. Sa laing taho, gibutyag ni San Marcos ang kahulugan sa mga hitabo: nga ang kaayohan sa lawas naghatag og kaayohan sa kinatibuk-ang pagkatawo. Kining maong pagkasaysay nahimong sumbanan alang sa matag matuohon. Human maayo ang kinatibuk-an tang pagkatawo pinaagi sa gahum ni Hesus, kita usab kinahanglan magtugyan sa tanan tang kusog aron mag-alagad sa Ginoo.

Dili paigo ang atong pagkaikag sa mga milagrosong pagkaayo. Miikyas si Hesus layo sa mga katawhan nga igo lang miisip niya nga usa ka tig-himog milagro. Hinoon miadto siya sa kamingawan ug nag-ampo aron sa pagpangita sa matuod nga kahulugan sa iyang misyon. Una ug labaw sa tanan, siya kadtong magpupugas nga

nagsabod sa Pulong ( Marcos 4:3) Ang iyang pulong, labaw pa kay sa mga milagro, kinahanglan maoy magtandog kanato.

**Pamalandongi kini:**

Nakasinati ka na ba sa makaayong gahum ni Hesus? Hain man ang nakatandog nimo: ang iya bang pag-ayo nimo o ang iya bang pulong nga imong nabatian? Imo bang gigugol ang tibuok mong kusog aron sa pag-alagad sa Ginoo?

**Febrero 12, 2006 – Ika-6 nga Domingo sulod sa Tuig**  
 Basahon: Lv. 13:1-2, 44-46/1 Cor. 10:31-11:1/ **Mk. 1:40-45**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Sa panahon ni Hesus, ang sakit nga sangla wala lang isipa nga walay kaayohan nga balatian, nangahulugan pa gayod kini og usa ka kamatayon sa katilingban tungod kay ang sanglahon sinalikway man sa katilingban. Mao kini ang labing dako nga kadaut nga mapahamtang sa Dios ngadto sa mga makasasala. Ang makasasalang katawhan gipanig-ingon ni Propeta Isaias samag sanglahon. Sa samang paagi, gihulagway niya ang misteryosong Sulugoon nga maoy magbayad sa mga sala sa Israel.

Sa kinatibuk-an, ang paghimamat ni Hesus sa sanglahon nagbutyag sa hingpit nga kahulugan niini. Makita ta ang giisip nga hugaw- ang sanglahon-atubangan sa balaan, ang sinalikway atubangan sa Sulugoon nga isalikway, ang mahugawng sanglahon atubangan sa putli nga malaksot ingog sanglahon. Ang makasasalang kalibutan maoy gihikap ug

gihinloan sa Manunubos. Miabot na ang Mesiyas. Diha kaniya mahiuli ug mahibalik ang hininginlang katilingban nga patayng buhi.


Sa daghan ug nagkalainglaing paagi, ang sangla padayong naghatag og babag tali sa katawhan. Ang mga sanglahon karon mao ang mga masakiton nga nahikalimtan dinhi sa mga tambalanan, ang mga sinalikway nga anaa sa makaluluoyng kahimtang, ang mga adik nga gilikayan sa katilingban. Atubangan niining tanang mga sanglahon, kita kinahanglan mosalmot sa yanong sugilanon sa panaghimamat tali ni Hesus ug sa sanglahon. Kay kita angayng mosaksi usab sa atong kaugalingong pagka-sanglahon. Angay natong isugid ang mga kasal-anan nga atong gitago. Angayng mosinggit kita agig pag-ila sa kaugalingon tang kahuyangan. Sa ingon niini, maangkon ta pag usab ang atong kinabuhi ug mahibalik ta sa atong lugar diha sa katilingban tipon sa tanang tinubos. Tapos kita mahikap ug maayo, kita na usab ang mosangyaw sa Pulong. Magmalipayon kita kay nahibalik na ang kahimsog sa atong lawas. Karon kita na usab ang modawat sa mga sinalikway ug biniyaan kay naila man nato diha kanila ang ilang tawhanong dignidad.

**Pamalandongi kini:**

Nakaamgo ka ba sa imong kaugalingong pagka-sanglahon? Nasinati mo ba ang makaayong hikap ni Hesus sa imong kinabuhi? Midawat ka sa sa mga sinalikway ug mga biniyaan kay miila ka man sa tawhanong dignidad nga anaa kanila?

“Pasidunggi ang Ginoo pinaagi sa paghalad kaniya sa labing maayong abot sa imong yuta”

Panultihon 2:9



# KATILINGBAN

Ang sangla nga panahon sa Dios: Ecdesial Community (EC), sa parokya sa New

**TEAM MINISTRY**

*Team Moderator:* Bishop Filomeno G. Bactol, D.D.

*Team Members:* Fr. Marvyn A. Maceda

Fr. Benjamin C. Pantas

Fr. Jesus G. Ty

Fr. Kenneth Hendricks

Fr. Dario Bebillo

Fr. Francisco Colasito

*Newsletter Moderator:*

Fr. Marvyn A. Maceda

*Encoder:*

Vinna Sabroso

*Computer Specialist*

Oscar O. Borrinaga

*Business Managers:*

Rizalito V. Curso

Conchita Calvez

**PARISH FORMATION TEAM**

Eudoxia Canonoy	Reymund Icaín
Linda Roldan	Jonnell Quilaneta
Necitas Casado	Alfredo Olaer
Catalina Machete	Alfredo Paghubasan
Sonia Pitao	Danny Jayubo
Josephine Romero	Gualberto Tonelete
	Ramises Bongabong
	Jorge Manco
	Buddy Castro

**Febrero 19, 2006** - Ika-7 nga Domingo sa Tuig  
 Basahon :Is.43:18-19,21-22,24-25/ 2Cor. 1:18-22 /  
**Mk. 2:1-12**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

“Sukad masukad karon pa kita makakitag hitabo nga sama niini!” (Marcos 2:12 ).Ang panon sa katawhan didto sa Capernaum mas labing nadani sa pag-ayo ni Hesus sa paralitiko kay sa iyang pagpasaylo sa mga sala. Ang mga magtutudlo sa Balaod, sa ilang bahin, naglagot kang Hesus tungod kay miangkong man siya nga aduna siyay gahum sa pagpasaylo sa mga kasaypanan. Wala sila makasabot nga gilingkawas ni Cristo ang lawas sa paralitiko aron pagpakita nga may gahum siya sa pagluwas sa espiritu.

Kon kita pay nakasaksi sa pag-ayo ni Hesus sa paralitiko, susama pod tingali ka-walay klaro sa gibuhay sa mga taga-Capernaum ang atong mamahimong reaksyon. Kon hatagan kita sa kahigayonan, kita usab molinya aron maangkong gikan kang Hesus ang lawasnong kaayohan. Dili kita daling mangayo nga mamaayo ang atong mga kasingkasing. Sagad dali kaayo kitang magbagulbol ug magmulo sa atong mga ayay. Hayan naghilumhilom kita ug ato lang iluom ang unsay naa sa atong kasingkasing.

Apan si Hesus makabag-o ug makausab sa mga kasingkasing. Mianhi siya dili lang aron paghiuli sa lawasnong kabaskog kondili aron usab pagdala og pasaylo kay gihigugma man kita niya; kay ang Dios nagpakabuang man sa iyang paghigugma kanato. “Karon, magbuhat ako og bag-ong butang; karon dayon motungha kini. Inyo ba kining nakita?”(Isaias 43:19).

**Pamalandongi kini:**

Nadawat mo ba ang pasaylo sa Ginoo? Imo bang gitugotan si Hesus nga mobag-o sa imong kasingkasing?

**Febrero 26, 2006** – Ika-8 nga Domingo sa Tuig  
 Basahon : Hos. 2:16, 17, 21-22 / 2Cor. 3:1-6 / **Mk. 2:18-22**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

“Nganong magpuasa man ang mga tinun-an ni Juan nga Magbubunyag ug ang sa mga Pariseo. Apan ang imoha wala.” Tataw nga ang mga nangutana niini nagagikan sa ilang relihiyosong panghunahuna ug kultura. Kining maong pangutana tubagon ni Hesus. Dili pa panahon sa pagpuasa. Dili angay magpuasa samtang anaa pa ang pamanhonon. Tataw kaayo kini alang kanila nga nakasabot kon kinsa ang pamanhonon ug unsa kabag-o ang kinabuhi nga iyang gimantala.

Sa kalit lang modag-um ang kahayag sa masaligong kasadya. “Moabot ang adlaw diin kuhaon ang pamanhonon gikan kanila; nianang adlaw magpuasa na sila.” Sa liturhiya, ang pagpulipuli sa pagsaulog ug sa pagpuasa- sama sa tanang tawhanong kinabuhi- tataw kaayong nagtimaan sa atong kaamgohan nga ang gingharian sa Dios “miabot na... apan wala pa mahingpit.”


**Pamalandongi kini:**

Naila mo ba ang pamahonon ug ang kabag-o sa kinabuhi nga iyang gimantala? Sa imong kinabuhi anaa ba usab ang pagsaulog ug ang pagpuasa? Kanus-a man ikaw magsaulog? Kanus-a man ikaw magpuasa?



*Kuha atol sa gihimo nga Parish & BEC Christmas Party niadtong Diciembre 18, 2005*

## Baratong medisina sa SAC-BEC Pharmacy



Natuman na gayud ang pangandoy sa Diocesis sa Naval nga makaalagad sa katawhan pinaagi sa pagbaligya ug mga medisina nga barato diha sa pagkatukod sa Social Action Center-Basic Ecclesial Community Pharmacy (SAC-BEC PHARMACY) sa miaging bulan sa Enero.

Mahinumduman nato nga giablihan ug gibendisyonan ni Bishop Filomeno G. Bactol, D.D. ang BEC Botika sa Parokya nga nahimutang sa Apostolic Center Building kaniadtong Oktubre 2, 2005 atol sa religious fiesta sa atong parokya sa Naval. Gikan kaniadto, gipaningkamutan ni Fr. Bing Colasito, ang Social Action Director sa Diocesis sa Naval, nga maisa ang botika sa parokya ngadto sa usa ka Pharmacy. Ang panuyo niini mao nga aron makabaligya ang pharmacy ug mga medisina nga sarang iresita sa mga doctor ug dili lamang kadtong mga ordinaryong medisina nga mapalit nato sa botika bisan kon walay resita.

Ubos sa pag-alagad ug tabang ni Sis. Rosalinda A. Abilar, usa ka inila nga pharmacist sa lungsod sa Naval, nakasugod na sa miaging bulan pagpamaligya ang atong pharmacy ug mga medisina nga sarang iresita sa mga doctor sa barato nga presyo.

Kon kamo may panginahanglan sa medisina, ayaw pagpanuko pagbisita sa atong SAC-BEC PHARMACY nga nahimutang sa Apostolic Center, tapad gayud sa atong Simbahan sa parokya. Abli ang pharmacy gikan sa 8:00 AM hangtud 12:00 sa udto ug 2:00 PM hangtud 6:00 PM, Lunes hangtud Sabado, sa pag-alagad kaninyo.

## BEC-BOS Seminar Nagapadayon

Tungod sa hingyap sa katawhan, gipasiugdahan na usab sa atong Parish Formation Teams (PFTs) ang paghimo ug Basic Orientation Seminars sa BEC.

Mahinumduman nga nahuman na sa miaging tuig ang pagpanghatag sa maong seminar libot sa mga barangay ug sitios. Karon, tungod sa daghang mga hangyu, nagsugod na usab ang atong mga PFTs sa paglibot sa mga sitios ug mga kabarangayan sa ikaduhang higayon aron sa pagpasiugda niining maong seminar sa nanginahanglan niini.

Una nga gihatagan ug seminar ang Barangay Atipolo niadtong Enero 16-21, 2006, sa matag 7:30 sa gabii, didto sa ilang kapilya. Gitambungan kini sa may 33 ka mga pamilya. Gihimo ang graduation mass niadtong Enero 21, 2006, Sabado, sa alas 6:00 ang takna sa gabii ubos sa pagpangulo ni Fr. Marvyn Maceda, ang priest-in-charge sa Atipolo.

Misunod nga gihatagan sa maong seminar sa ikaduhang higayon ang Sitio Cogon sa Brgy. Larrazabal sugod niadtong Enero 30, 2006 nga gitambungan sa 23 ka mga pamilya.

## Bible Week Celebration

Gipasiugdahan sa Diocesan Commission on Bible Apostolate ang National Bible Week Celebration kaniadtong Enero 23-29, 2006 dinhi sa parokya sa Naval. Ang tema sa maong kasaulugan mao: *“God’s Word: Power for National Renewal.”*

Si Fr. Bing Colasito, ang Chairman sa Bible Apostolate sa diocesis, nagbutyag nga gipasiugdahan kini nga kasaulugan sa *Catholic Bishops’ Conference of the Philippines* (CBCP) alang sa tulo ka mga importante nga katuyuan: una, pagdugang sa kasayuran sa kaimportante sa National Bible Week; ikaduha, pag-aghat sa katilingban pagsalmot sa pagbag-o sa nasud pinasikad sa Pulong sa Diyos; ug ikatulo, pagdugang sa kasayuran sa kaimportante sa Bibliya diha sa Pamilya ug sa pagdasig sa pagbasa niini.

Pipila sa mga aktibidades nga gihimo mao ang paghatag ug Bible Seminar ug Bible enthronement sa mga eskwelahan, ang pagpromote sa Radio Program *“Biblia ug Kinabuhì”*, ug ang pagpromote usab sa BEC Bible.

Gitapos ang selebrasyon kaniadtong Enero 29, 2006, isip kasaulugan sa National Bible Sunday. Dinhi gihimo ang Launching sa BEC Bible sa mga misa nga gisaulog sa Cathedral Church.



## **Kasaulugan sa Fiesta nagmalampuson!**

Malampuson nga gisaulog sa parokya sa Naval ang *municipal fiesta* pahinungod sa Mahal nga Birhen sa Pagrosaryo niadtong Enero 26-27, 2006.

Mainiton nga gitambungan sa nagkalainlaing BECs sa parokya ang Pontifical Mass nga gipanguluhan ni Most. Rev. FILOMENO G. BACTOL, D.D., Obispo sa Naval, niadtong Enero 27, sa 9:30 ang takna sa buntag diha sa Cathedral Church. Gitagaan ug dako nga pagtagad ang presensiya sa mga BEC sa dihang gihimo na usab ang paghalad sa mga gasa kada BEC.

Usa sa mga highlights sa fiesta mao ang selebrasyon sa Halad sa Birhen nga gihimo sa Naval *Gymnasium* ug gisalmutan sa Naval Institute of Technology, Naval School of Fisheries, Cathedral School of La Naval ug Lucsoon National High School. Gitapos ang selebrasyon sa fiesta pinagi sa usa ka prosesyon sa 5:00 sa hapon sa Imahen sa Mahal nga Inahan sa Santos nga Pagrosaryo libot sa lungsod sa Naval.

Ang tema sa kasaulugan sa fiesta karon mao: *“The Word of God and the Rosary in the Heart of every Family.”*

## **CBCP Meeting**

Ang atong tinahud nga Obispo sa Diocesis sa Naval, Bishop Filomeno G. Bactol, D.D., miadto sa Manila aron pagtambong sa panagtigum sa kaobispoan sa Pilipinas nga gihimo kaniadtong Enero 28 – 30, 2006. Atong i-ampo nga magmalampuson unta ang maong panagtigum alang sa kaayohan sa atong Simbahan, sa atong nasud ug sa tanang katawhan.

## **“Love Percent” para sa Diyos**

Sugod niadtong bulan sa Oktubre sa miaging tuig, gipasiugdahan na sa parokya sa Naval ang paghatag ug kasayuran sa mga matuohon pinaagi ug mga seminars mahitungod sa *“Love Percent”* o *Tithing*. Kini gihimo aron mapalawum pa gayud ang atong kasayuran mahitungod sa atong obligasyon sa Diyos ug sa atong Simbahan.

Subay sa kasinatian sa Diocesis sa Romblon, ang programa sa *“love percent”* gitawag nato nga *“Balik-Halad ug Pasalamat sa Diyos.”* Sukad Oktubre hangtud karon, aduna nay kinse ka mga BEC nga nahatagan sa maong seminar ug aktibo na nga nagpaambit sa ilang Balik-Halad ug Pasalamat sa Diyos. Ang maong mga BEC mao ang: Cathedral School of La Naval (CSN), Atipolo Sentro Potat, Atipolo Maribuhok Dangkalan, Lower Anas, Upper Anas, Upper Calumpang, Lower Calumpang, Lomboy, Catmon 1 & 2, Caraycaray Zones 1-4, ug Sitio Ilaya.

Ang tibuok Lucsoon District ubos sa pagpangulo ni Fr. Dario Bebillo natagaan na sa maong seminar ug aktibo nga nagahimo sa ilang pagbalik-halad sulod na sa usa ka tuig.

Ang *team of speakers* sa atong parokya alang niining Balik-Halad mao sila si: Fr. Marvyn Maceda, Bro. Demetrio Jaguros, Atty. Meljohn de la Pena, Bro. Alfredo Paghubasan, Bro. Nick Astillo, Sis. Zenaida Paghubasan, Sis. Myrnalyn Perdugas, Sis. Flocerfina Gonzales ug Sis. Deling Bornillo.

## **Vocation Month Gitapos**

Gitapos kaniadtong Enero 27-28, 2006 didto sa Cabucgyan Central School, Cabucgayan, Biliran ang selebrasyon sa Vocation Month sa Diocesis sa Naval pinaagi sa usa ka overnight program ug vigil nga gipanguluhan sa Diocesan Commission on Clergy and Vocations.

Gitambungan ang maong okasyon sa mga *youth delegations* sa nagkalain-laing parokya sa diocesis uban usab sa nagkalain-laing mga *religious congregations* sa mga madre. Ang mitambong nga mga religious congregations mao ang Daughters of St. Teresa (DST), Franciscan Sisters Pro Infante et Familia (FSPif), Religious Sisters of Mercy (RSM), Sisters for Christian Community (SFCC), ug Sisters of the Congregation of St. John the Baptist (SCJB).

Ang kasaulugan gitapos pinaagi sa usa ka dawn rosary sa alas 4:00 AM. Gisundan dayon kini sa misa didto sa *parish Church* nga gipanguluhan ni Msgr. Silas Florencio, HP kauban nila Fr. Litoy Remandaban, III (nga mipangulo sa tibuok kasaulugan hulip kang Fr. Junjun Amante nga nagpaayo pa sa iyang operasyon sa tuhod), Fr. Tony Sevilla, Fr. Bedel Mocerro, Fr. Bebot Gerones, Fr. Pops Dolina ug Fr. Marvyn Maceda.

# Gitik-gitik sa Kinabuhi

Kung mamatay na tang tanan, paingon ta sa langit.  
Kinsa ma'y unang pasudlon: lalaki, babaye,  
tomboy, o bayot?

Tubag: Bayot, kay mag decorate pa man sila.  
-oOo-

Pikoy: Pangit! Pangit!

Lalaki: Sulti'g pangit usab, kay himulbulan ta ka!  
*Sa sunod adlaw ...*

Pikoy: Psst!

Lalaki: Unsa man?

Pikoy: Kahibalo na ka!

-oOo-

*Unang adlaw kadto sa Klase:*

Mom (to teacher): Ma'am, very sensitive po ang  
anak ko. Kung kailangan n'yo po siyang  
parusahan, sampalin n'yo lang ang katabi  
niya. Matatakot na 'yan!

-oOo-

*Sa usa ka restaurant.*

Man: Waiter, bakit ang tagal ng inorder ko. Ilan ba  
ang cook ninyo dito?

Waiter: Ay, surry Sir, wala man mi cuk, pipsi lang  
ug sibin up.

-oOo-

Guro: Sino si Jose Rizal?

Juan: Di ko po kilala.

Guro: Ikaw Pepe?

Pepe: Di rin po.

Guro: Di ninyo kilala si Jose Rizal?

Pedro: Ma'am, baka sa kabilang section s'ya!

-oOo-

Nine qualities of a good student:

Positive thinker, Artistic, Loving, Active, High-  
spirited, Unique, Bubbly, Outspoken, Game!

In short, P.A.L.A.H.U.B.O.G.

-oOo-

*Tulo ka bata ang gipatindog sa stage ug gipahilwas  
sa ilang alphabet.*

Kano : Ei, Bi, Si, Di, Ee ...

Tagalog : Ah, Ba, Ka, Da, Eh ...

Muslim : Di Bi Di, Bi Si Di, Em Pi Tri ...

-oOo-

Titser: Ang pangit na pangalan mo, Conrado  
Domingo! In short - condom!

Pupil: Ok lang po, Ma'am! Pero mas pangit ang sa  
husband n'yo, Supronio Potenciano! In short -  
supot!

Source: Hometown Naval website

## BEC ACTIVITIES

Pebrero 2006

Febrero 4 – ( 1st Saturday)

**Cluster Fellowship**

BEC Ilaya & Smo. Rosario

Venue: Cathedral Church

Time : 7:30 pm. 10:00 pm.

Febrero 18 - ( 3RD Saturday )

**PAROCHIAL FELLOWSHIP**

Venue: Brgy. Cabungaan Chapel

Time : 8:00 am.- 3:00 pm.

Febrero 19 – (3rd Sunday )

**PAROCHIAL FELLOWSHIP**

Venue : Sitio Cogon, Larrazabal

Time : 8:00 am.- 3:00 pm.

## BEC ANNIVERSARY

BEC Hospital Drive

Febrero 15, 2006 (Miyerkules)

BEC Brgy. Caraycaray zone 4

Febrero 22, 2006 ( Miyerkules)

BEC Brgy. Sto. Nino

Febrero 28, 2006 ( Martes)

**NAVAL COUNTRY INN**

*"Your home away from home"*

&

**NAVAL TOWN CENTER**

**LJC** *Rice Mill & Groceries*

Sitio Lupa, Calumpang

Ground Floor, Naval Mall

Owned and Managed by:

**BONG BONGABONG**